

Prome Minister ta entrega plakkaat na baluarte di Savaneta

Nicolina 'Pina' van der Linden a dedica su bida na muchanan y deporte



ORANJESTAD(AAN): Un berdadero Savanetero di pura sepa; naci, lanta y biba henter su bida den e distrito, Señora Nicolina van der Linden ta ademas un mama y amante di deporte. For di chikito el a motiva, apoya y transporta e deportistanan chikito di e bario.

Awendia, hopi di nan ta keda cord'e y tin un cariño special p'e. Pesey y un cantidad di motibo mas, e bario di Savaneta caminda Prome Minister y BoBario a pasa e siman aki, a scohe 'Pina' manera e ta conoci mey di su hendenan, pa ta e baluarte di nan bario.

"Unda cu a pasa continuamente e nomber di Sr. Pina a

bin dilanti como un persona cu a duna hopi di su tempo liber pa yuda muchanan den deporte na San Luis," asina Prome Minister Mike Eman a comenta ora cu diahuebs mainta a pasa na Señora Van den Linden su cas pa entreg'e un plakkaat. "Den henter Savaneta y Aruba tin un aprecio hopi grandi pa e trabao aki. Asina mes cu Señora Pina tin retonan di salud, e ta keda sirbi nos comunidad," Premier Eman a añadi na su palabranan di elogio.

Tur siman Gobierno di Aruba ta duna honor na un persona di e bario cu ta destaca den un tereno of otro como un figura ehemplar di comunitarismo of ciudadanía. Den

e caso di Savaneta, Señora Pina ta conoci como esun cu pa decadanan largo a hiba e miembronan di e teamnan di futbol, baseball y ping pong pa weganan cu nan tabatin rond di Aruba. Señora Van der Linden ta corda ainda cu hopi emocion con e much-



anan tabata yena su auto cu alegria y energia. Tambe el a yega di biaha cu delegacion pa otro paisnan caminda a yuda wak pa nan y apoya nan den tur competencia. "Minimo cu nos por haci como Gobierno ta para keto y bisa danki di curazon, entregando di un forma cu e por keda permanentemente na cas como muestra di gratitud," nos prome mandatario a bisa. E momento aki tabata compana pa aplauso y alegria di famia, amigo y miembronan di BoBario presente na cas di

Señora Pina. Masha emocion, el a bisa "Masha masha danki na boso tur y tambe na Minister. Si mi tabatin pia lo mi a sigui traha" cu cual el a muestra cu limitacionnan fisico por stroba, pero no por stop e spirito di un persona ora cu e kier contribui na su famia y na su pais. Señora Pina ta biba net dilanti di veld di San Luis Deportivo, caminda semper cu tin wega, e ta pidi pa e worde hiba y bou di e afdak e ta sigui e wega y ta apoya e muchanan.